

LA CARTA DEL APOSTOL SAN JUDAS

Judas embesa Dios chiirabo je

¹Judas rei se. Jesucristo rimba. Jacobo nongue rei se. Ñ ambesa quia jėje a. Dios chiirabo je. Dios que jëirabo ino icúe umbaerã nda. Dios riqui nyesequa tuchi jendese co. Dios riqui jenderecoquiato bei Jesucristo mbaerã co. ²Sã Dios riqui ndua bei jendese. Sã eriqui jembia bei. Sã eriqui nyesequa bei jendese.

Ae Jesús quiato saã ñooño nguia

³Jesucristo nandemingo beisa rĩĩ ngue ambesa seese rei nguiã jējē. Ae mbia mbaa tambesa jėje. Jëingo eã nonde erese. Úquĩ ñee icuã icuã mose Dios cheē nii, echeē jësibishorō. —Dios cheē tuchi chō ñene, jenje tuchi quiato quia Dios cheē ndiquisã quisã mbia icuã si. Dios quiato ngue ucheē mondo ja nguiã nguesenda ja je. ⁴Dios quiato raã naasa mo ndiqui mbia mbaaquiato icuã icuãte ũquĩ. Úquĩ siquĩã tuchi chō nguiã Dios rese ũquĩ. —Sã Dios riqui aba icuã mbutiã uturã je c o no jē. Nyebe mbae icuã nandesã i i chō jē, i chōchĩ nguiã ũquĩ. Jesucristo cheē ndui eã tuchi chō ũquĩ nde. Nandererequa cheē ndui eã. Cosete que Dios ũquĩ mbiicúe embasi sacuã nda. Mbasi mbasi bei ra equia cote.

⁵Mbae tasenei na jėje. Jëicuate raque. Taemunduabe erese. Dios ngue judíos sirō ja rei nguiã Egipto si cose. Mbiam hue jenda icuã icuã mose ee. Úquĩnde que siqui sereã Dios rese cote ra. Nyebe Dios eiquia nguiã. ⁶Sã ángeles mo je Dios ñee ndei no jē. “Aa jëingo aa”, sã i rei ee no jē. Sã Dios cheē mumba chō no jē. Sã Dios riqui etarōi nderequia itondaruqui re co no. Embasi mbasi bei sacuã cote. ⁷Sã Sodoma jenda no. Sã Gomorra jenda no. Sã ũquĩ ndurubinda ja no. Siqui chooño eã. Mbae icuã naamba amba. Siqui siqui emo ninisi rese. Eruã mo ndese abe no. Nyebe que Dios ũquĩ mombo tata cuásuu ra. Mbae rasi ra esaã mbei u huee cote. Mbiam mundua ndua sacuã ño ũquĩ nde.

⁸Ae Dios quiato saã saã nguia nae, ùquĩ ndiqui ndua icuã icuã mbei ùquĩ. Nyebe eriqui nguia nguete mbiicuã ùquĩ. Aba cheẽ mumba. Ñee icuã ángeles ibatenda abe riĩ no. ⁹Sã Miguel ángel rerecua no. Sã ñee asi asi nyue diablo rese no. Moisés rete riĩ. —Mbae icuã tasaã ndeje, i eã ngue diablo je ra. —Dios quiatu ra mbae rasi saanguquia ndeje, i chõ ngue ñee diablo je ra. ¹⁰Ae Dios quiato saã saã nguia nae, ùquĩ ndiqui ñee ñoño mbae uchiicuayã nii ã. Ae eicuate quia mbae nae, ùquĩ ndese siqui turã eã. Siqui choño eã ùquĩ ndese. Nyebe ra Dios embasi tuchi cote. Quiaa riinda quia mbae icua jiri nguia ùquĩ si. ¹¹Aba mbia eã tuchi chõ ùquĩ nde. Caín na tuchi chõ eriqui nguia mbae icuã naa naa ùquĩ. Balaam abe rã si chõ eriqui nguia icha icha Dios si ùquĩ. Mbae isiquia achõ ndese siqui sacua. Aba cheẽ mumba mumba bei chõ nguia Coré rã ùquĩ. Nyebe ra Dios mbae rasi saanguquia ee Coré rã si. ¹²Ae Jesús quiato saã saã nguia nae, aba ireingua tuchi chõ ùquĩ nde. Jeñumunua nua mose quiaru sacua nyiese, ùquĩ ndiqui quiaru choño ño ùquĩ. Mbae abe mbei choño. Ico choñoa abe mbia mo je. Mbiamba reaquiatusa mo na eã. Nguete mii ño ùquĩ tequiatu nguia ùquĩ. Sã ibei rondei riqui raque pã i mose no. Sã eriqui nyaaquía no jẽ. Sã quiririã ndiqui ibei rondei rerao no jẽ. Ùquĩ na ño Dios quiato raã naasa riqui nguia ã. Mbae iabae je rã abe chõ eriqui nguia ã. Ira shii rã abe no. Ira riqui ji rã abe no. ¹³Ama ndebera rã abe chõ ùquĩ ndiqui nguia ùquĩ. Mbiamba quiatu quiatu mose, i richoi rã ño ùquĩ nde. Sã nyasitata riqui oso nguenda recha no. Eĩ si chõ ùquĩ nguia ùquĩ. Nyebe ra mbae rasi raã tuchi itondaruqui re.

¹⁴Enoc abe que ñee ùquĩ icuã nii nda. Adán ndiirĩ nducucha rei ae. Eĩ ngue ñee nda: “Dios ra tu nguimba tubiriã ndese. ¹⁵Mbia icuã mbasi ja ra eu. Ae icuã mbia saã saã nguia nae, ùquĩ ndese ra mae ja. ‘Mbae icuã asaã áte resẽ’, i aroneate ra ùquĩ cote. Ae ñee icuã nguia Dios riĩ nae, Dios ra echeẽ icuã senei a e sí je cote. ‘Eĩ ere que equia ñee icuã serii nda’, i ra Dios ee. Echisaã icuã tuchi chõ ùquĩ nde”, i que Enoc ñee cose ra. ¹⁶Echiichati tuchi chõ ùquĩ nde. Ñee icuã mbei equia emo nii ùquĩ. Ae rese eriqui sete nae, ùquĩ mii ndese chõ eriqui nguia ndua ùquĩ. Ucuasu raã ñoño. Uchuru mondo choño. Ñee turã abareã nea emo je. Mbiirĩ irĩ ño nguia ñee turã abareã nea ee.

Ã jesaã saã, i Judas Jesús quiato je

¹⁷Jẽ nguia rei Jesús quiato tuchi. Jesús chimbaaquiato cheẽ si jêtesarei eã. Á ndei echeẽ ã: ¹⁸“Mbae ua ja nonde ra mbia iquia iquia Dios cheẽ je. Ae icuã ndese eriqui sete nae, ùquĩ mii ndese chõ nda eriqui nguia ndua”, i que Jesús chimbaaquiato ñee cose ra. ¹⁹Mbiamba mbuqueta quetasa tuchi chõ ùquĩ nde. Ae ebite mbae icuã nae, ùquĩ ndese achõ ño eriqui nguia ndua. Espiritu Turã siqui áte echiangui re. ²⁰Jẽ nguia jeñimbiracuã tuchi quia Dios rui. Dios jëicua tuchi. Jeñee mbei Dios je. Sã Espiritu Turã

ndiqui jembucheẽ mbei Dios je. ²¹Jẽingo bei quia Dios rese. Ɣ̃nda jeñee. —Nyesequa tuchi chõ equia nanderese re, i. Jesucristo ia eã tuchi que nanderese ra. Nyebe ra nandemingo bei tu mose. Ɣ̃quĩ jẽsaarõ mbei quia. ²²Ae Dios tiisu isu quia nae, Ɣ̃quĩ jembuti mbuti quiatu quia Dios cuti. ²³Mbia icuã mo abe jemingo Dios rese. Tata si erirõ naanguia jemingo Dios rese. Eicuã tuchi raque. Jẽingo tuchi quiatu quia Dios rese. Ɣ̃quĩ icuã uba eã sacuã jendese.

Judas ñee turã Dios riĩ

²⁴Dios miĩ ño jendeaquiatu bei nguiã jembiiicha eã sacuã. Dios miĩ ño jeñiangui renda icuã mbuchicuabo nguiã jemingo sacuã uchiese. Dios miĩ ño jembia bei nguiã no. ²⁵Dios miĩ ño mbae icua ja nguiã. Dios miĩ ño nandemingo bei nguiã Jesucristo riĩ no. Ae je ra mbia ñee turã mbei quia. Ae rei eturã tuchi. Ae rei ererequa tuchi. Ae rei eqirãcuã tuchi. Eĩ mbei chõ ae re. Amén.